



# Foreldrahandbók Skýjaborgar

Uppfærð apríl 2026



## Velkomin í Skýjaborg

Kæra leikskólabarn og fjölskylda,

Velkomin í leikskólann Skýjaborg. Við erum ánægð að fá ykkur í hópinn og vonum að ykkur eigi eftir að líða vel í Skýjaborg.

Í Skólanámskrá Leik- og grunnskóla Hvalfjarðarsveitar er að finna helstu upplýsingar um lífið og starfið í Skýjaborg. Í þessari handbók má finna ýmsar upplýsingar sem varða starfsemi leikskólans, eru ekki í skólanámskránni og gott er að kunna skil á.

Við hvetjum ykkur til að lesa skólanámskrána og foreldrahandbókina áður en aðlögun hefst.

Með von um gott samstarf

Starfsfólk Skýjaborgar



## Hagnýtar upplýsingar um skólann

Leikskólinn er fyrir börn frá 18 mánaða til 6 ára. Ef pláss er í leikskólanum er heimilt að taka inn börn allt niður í 12 mánaða. Deildirnar eru aldurskiptar. Á Dropanum eru börn frá 18 mánaða til tveggja/þriggja ára. Á Regnboganum eru börn frá tveggja/þriggja til sex ára. Sólin – færanleg kennslustofa hér fyrir utan leikskólann er hluti af Regnboganum og hefur hluti barna heimastofu þar.

Æskilegt er að börn yngri en tveggja ára séu ekki lengur en 8 tíma á dag í leikskólanum. (Æskilegt er að 12-18 mánaða börn séu ekki lengur en 6-7 tíma á dag). Stefnt skal að því að daglegur dvalartími barns verði ekki lengri en 8,5 klst.

Í upphafi leikskóladvalar gera foreldrar og leikskóli dvalarsamning þar sem dvalartími barns er ákveðinn. Leikskólinn er opinn frá 7:30-16:30. Barn má mæta innan umsamins dvalartíma og er mikilvægt að foreldrar virði það. Opnað er á annarri deildinni kl. 7:30, en hin deildin opnar um kl. 8:00. Deildirnar sameinast úti eða á annarri hvorri deild um 16:00. Forráðamenn sækja um breytingar á dvalartíma í gegnum [umsóknarvef Völu](#).

Skipulagsdagar eru að jafnaði fjórir heilir dagar á ári og fjórir hálfir (frá kl. 12:00). Hálfir skipulagsdagar eru settir saman í heila ef mögulegt er. Þessa daga nýtir starfsfólkið til skipulagningar, endurmats, sí- og endurmenntunar og undirbúnings starfsins. Dagsetningar koma fram í skóladagatali ár hvert og eru því auglýstar með góðum fyrirvara.

Lokað er á aðfangadag og gamlárstag. Leikskólagjöld eru ekki frádregin þessa daga. Leikskólinn er lokaður í 20 virka daga yfir sumartímann. Leikskólagjöld eru ekki greidd þann tíma.

Leikskólastjóri: Eyrún Jóna Reynisdóttir

Netfang: [eyrun@hvalfjardarsveit.is](mailto:eyrun@hvalfjardarsveit.is)

Rekstraraðili leikskólans: Hvalfjarðarsveit.

Málefni leikskólans falla undir Fræðslunefnd Hvalfjarðarsveitar.

Heimasíða: <http://skoli.hvalfjardarsveit.is>.

Heimilisfang: Innrímel 1, 301 Hvalfjarðarsveit.

Símanúmer: 433-8530.



Matráður: Viktoria Pelekh 100% staða og Diljá Marín Jónsdóttir 14,3% staða.

Starfsfólk Dropa frá apríl 2026:

- Ásdís Björg Björgvinsdóttir deildarstjóri 100% staða
- Ágústa Rós Jónsdóttir leiðbeinandi 100% staða
- Hanna Bergrós Gunnarsdóttir leiðbeinandi 100% staða
- Helga María Guðmundsdóttir leiðbeinandi 46% staða
- Karina A. Podlowska leikskólakennari 100% staða

Starfsfólk Regnboga frá apríl 2026:

- Elva Rut Árnadóttir deildarstjóri 100% staða
- Árdís Hauksdóttir leiðbeinandi 85% staða
- Diljá Marín Jónsdóttir leikskólakennaranemi 85,7% staða / Verkefnastjóri Sólarinnar
- Guðmundur Skarphéðinn Gíslason (Mummi) leiðbeinandi 100% staða
- Milena Jozefik leiðbeinandi 60% staða / 100% frá maí
- Sérkennsla / stuðningur:
  - Sigurbjörg leikskólasérkennari 60% staða
  - Védís Fríða Kristjánsdóttir leiðbeinandi 100% staða
  - Ólöf Guðmundsdóttir sérkennari, viðvera á miðvikudögum frá 8-13.
- Þórdís Þórisdóttir leik- og grunnskólakennari, viðvera á fimmtudögum frá 8-13. Hennar starf er í tengslum við skólasamstarf, læsi og fleira.

Sumarstarfsfólk 2026:

- Guðlaug Gyða Hannesdóttir leiðbeinandi hefur störf 19. maí
- Lilja Sól Bjarnadóttir leiðbeinandi hefur störf 21. maí
- Linda Þórarinsdóttir leiðbeinandi hefur störf 1. júní
- Sædís Ósk Pálmadóttir leiðbeinandi hefur störf 22. maí

Í leyfi:

- Agnieszka Aurelia Korpak (Aga) leikskólakennari



- Bára Tómasdóttir leikskólakennari
- Ingibjörg Unnur Sigmundsdóttir leiðbeinandi

## Trúnaður

Starfsfólk er bundið þagnarskyldu um alla þá vitneskju sem það fær í starfi um málefni barna og foreldra. Þagnarskylda helst þó starfsmenn láti af starfi.

Viljum við biðja foreldra/forráðamenn einnig um að sýna trúnað og þagmælsku gagnvart því sem þið verðið áskynja og varðar persónuleg málefni barna, foreldra og starfsmanna í leikskólanum. Gagnkvæmur trúnaður er mikilvægur öllum börnum og foreldrum og eykur samheldni innan leikskólans.

Leikskólinn tryggir að eingöngu þeir aðilar sem til þess hafa heimild hafi aðgang að upplýsingum leikskólans. Leikskólinn tryggir að upplýsingar séu aðgengilegar þeim sem hafa heimild og þurfa að nota þær þegar þeirra er þörf.

## Tilkynningarskylda

Leikskólanum ber skylda til að tilkynna til barnaverndar ef starfsmaður verður var við eða hefur grun um að barn búi við óviðunandi uppeldisskilyrði. Ef opið barnaverndarmál er hjá barni eru einungis þeir starfsmenn upplýstir sem þurfa þykir, eins fáir og mögulegt er.

## Dagskipulag Dropans

- 7:30- Leikskólinn opnar. Opnað er á annarri deildinni.
- 8:30- Morgunmatur
- 9:00- Hópastarf / Frjáls leikur  
Ávaxtastund / samvera  
Útivera
- 11:00- Hádegismatur  
Hvíld  
Frjáls leikur inni eða úti
- 14:30- Miðdegishressing  
Samvera / frjáls leikur
- 16:00- Deildir sameinaðar á Regnboganum/Dropanum.
- 16:30 Leikskólinn lokar



## Dagskipulag Regnbogans

7:30- Leikskólinn opnar. Opnað er á annarri deildinni.

8:30- Morgunmatur

9:00- Hópastarf / Frjáls leikur  
Ávaxtastund / samvera  
Útivera

11:30- Hádegismatur  
Hvíld / lestur / róleg stund  
Frjáls leikur inni eða úti

14:30- Miðdegishressing  
Samvera / frjáls leikur

16:00- Deildir sameinaðar á Regnboganum/Dropanum.

16:30 Leikskólinn lokar

Dagskipulagið er vinnuskipulag sem við vinnum út frá. Tímasetningum skal taka með fyrirvara.

Í leikskólastarfinu riðlast tímasetningar vegna ólíkra verkefna. Barnið og þarfir þess eru ávallt í brennidepli. Ef borða á morgunmat þarf barn að vera mætt fyrir kl. 8:50.

## Leikskólastarf

Í leikskóla skal leggja áherslu á skapandi starf og leik barna. Ekki er um beina kennslu að ræða sem stefnir að ákveðinni fræðilegri þekkingu. Leikskólafræði er fremur þroskamiðuð en fagmiðuð, með áherslu á leik barna sem náms- og þroskaleið, uppgötvunarnám.

Leikskólastarfið byggir á lögum og reglugerðum um leikskóla, aðalnámskrá leikskóla og skólanámskrá Skýjaborgar.

## Leikurinn

Leikurinn er náms- og þroskaleið í leikskólastarfi. Í bernsku felur leikur í sér nám. Af leik sprettur ný þekking, ný tilfinning, nýjar athafnir og leikni. Í leik tjáir barn tilfinningar sínar og fær útrás fyrir þær. Sköpunarþörf og hugmyndaflug barnsins birtast í leikjum þess.

Í Skýjaborg er leitast við að leikurinn fái nægt rými og tíma til að þróast og eflast. Dagskipulag og umhverfi er sett upp með þau markmið í huga.



## Kenningar og starfsgrundvöllur

Í leikskólanum er unnið skv. hugmyndafræði John Dewey um nám í gegnum reynslu (learning by doing). Í leikskólasterfinu er þannig leitast við að auka þekkingu og þroska barna með því að þau séu þátttakendur í leikskólasterfinu og fái að reyna við hluti sjálf.

Starfsaðferðir í leikskólanum markast af kenningum Howard Gardner um fjölgreindir og Caroline Pratt um opinn efnivið. Leitast er við að hafa fjölbreytt verkefni sem henta getu og áhuga hvers og eins, sem og að efniviður sé þannig valinn að hann gefi ekki fyrirfram ákveðnar lausnir. Á þann hátt fær sköpun og hugmyndaauði barnsins að ráða för.

Unnið er samkvæmt snemmtækri íhlutun í mál og læsi og hefur leikskólinn gefið út handbókina *Handbók Skýjaborgar: Leikur, mál og læsi* því til stuðnings, sjá nánar hér: <https://skoli.hvalfjardarsveit.is/static/files/handbok-skyjaborgar-leikur-mal-og-laesi-final.pdf>.

## Markmið

Í leikskólanum er unnið með gildi sem þeir aðilar sem koma að stefnumótun leikskólasterfsins telja mikilvæg.

**Velliðan, virðing, metnaður og samvinna** eru einkunnarorð skólans og leggur skólinn þau til grundvallar í starfi sínu. Í öllu starfi er leitast við að rækta og efla virðingu, sjálfstæði, samvinnu, metnað, sjálfshjálp, jákvæð samskipti, kurteisi og umburðarlyndi. Unnið er með þessi gildi í öllu starfi leikskólans og geta kennarar ávallt spurt sjálfa sig að því hvort starf þeirra eða viðbrögð samræmist uppeldissýn leikskólans.

Leikskólinn hefur fengið leyfi til að flagga Grænfánanum sem er alþjóðlegt verkefni til að auka umhverfismennt og styrkja umhverfisstefnu í skólum. Verkefnið samræmist gildum leikskólans vel, þar sem við leggjum áherslu á að bera virðingu fyrir umhverfi okkar. Einn af þáttum Grænfánaverkefnis okkar er útinám og er því reynt að tryggja góða útiveru á hverjum degi.



Frjáls leikur hefur mikið vægi í daglegu starfi þar sem hann er hornsteinn leikskólastarfsins. Frjáls og sjálfsprottinn leikur er hið eðlilega tjáningarform barnsins og greinist hann frá öðru atferli í því að hann er skapandi og barnið stjórnar honum sjálf.

Leikskólinn er þátttakandi í Vináttu – forvarnarverkefni Barnaheilla gegn einelti og býr Blær bangsi hjá okkur. Vinátta þjálfar félagsfærni og samskipti og stuðlar að góðum skólabrag. Nánar má lesa um verkefnið á <https://www.barnaheill.is/is/forvarnir/vinata>.

## Almennar upplýsingar

### Að byrja í leikskóla

Mikilvægt er að barn fái góðan tíma til að aðlagast leikskólanum. Aðlögunartími er skipulagður í samvinnu og samráði við foreldra. Foreldrar fá tækifæri til að dvelja með barninu og kynnast starfsfólki og starfinu í leikskólanum í aðlögunarferlinu. Smám saman dregur úr viðveru foreldra í leikskólanum og barnið aðlagast leikskólanum. Að öllu jöfnu tekur aðlögun um vikutíma (sjá viðauka með aðlögunaráætlun).

### Foreldrasamvinna

Góð samvinna foreldra og leikskóla er forsenda fyrir árangursríkri dvöl og góðri líðan barns í leikskólanum. Samvinnan þarf að byggjast á gagnkvæmri virðingu og opnum samskiptum. Daglegar upplýsingar um barnið heima og í leikskólanum eru nauðsynlegar því oft geta lítil atvik í lífi barns valdið breytingum á hegðun þess.

Foreldrum er velkomið að hringja í leikskólann til að spyrja um líðan barnsins og eins mun starfsfólk hringja ef þörf krefur. Smáskilaboð í Völu eru einnig notuð til samskipta.

Við leggjum áherslu á að vel sé tekið á móti barninu og að það finni að það sé velkomið í leikskólann og í lok dags sé barnið kvatt og því þakkað fyrir daginn. Mikilvægt er að foreldrar fylgi börnum sínum til starfsfólks þegar komið er í leikskólann. Það varðar öryggi barnanna að þau komist í öruggar hendur áður en þau eru kvödd. Jafn mikilvægt er að kveðja í lok dags. Það er gott að gefa barninu tíma til þess að ljúka við vinnu sína og kveðja starfsfólkið þegar það fer heim.



Börnum yngri en 12 ára er að jafnaði ekki heimilt að sækja börnin. Við biðjum foreldra að virða það.

Börn fara ekki heim í lok dags með öðrum börnum og foreldrum þeirra nema leikskólanum hafi verið tilkynnt um það af viðkomandi foreldri.

Við viljum minna foreldra á að loka alltaf hliðinu á öllum tímum. Börn eiga það til að vilja opna og loka hliðinu þegar komið er með þau og þau eru sótt. Vinsamlegast brýnið fyrir börnunum að það séu bara fullorðnir sem eiga að opna og loka hliðinu. Ef börnin þjálfast í að opna hliðið getur orðið úr því hættulegur leikur á skólatíma.

### **Vinsamlegast stöðvið bílvélina fyrir utan leikskólann.**

#### Forföll og veikindi

Foreldrar eru beðnir um að tilkynna um allar breytingar á viðveru barnsins, t.d. veikindi eða frí. Óskað er eftir að foreldrar hringi og tilkynni um veikindi eða fjarverur barnsins til starfsfólks deilda eða sendi skilaboð í gegnum Völu (nánar má lesa um Völu hér aftar).

Það er réttur barns að vera heima þegar það er veikt, t.d. með hita eða almenna vanlíðan. Veikt barn getur smitað önnur börn og starfsfólk. Veikist barn skal það dvelja heima þar til það hefur verið hitalaust í a.m.k. 1-2 sólarhringa og smithætta er liðin hjá. Ef barn fær mikið höfuðhögg er mikilvægt fyrir barnið að hvíla sig í um sólarhring heima, vegna álags á heilann og höfuðið við höggið, þótt ekki sjáist á barninu.

Leikskólinn er ætlaður fullfrískum börnum sem geta tekið þátt í öllu starfi leikskólans, jafnt inni sem úti. Útivera er hluti af starfsemi leikskólans og börnum mjög mikilvæg til að hreinsa lungu, styrkja og efla líkamann. Þess vegna er stefnt að því að hvert barn fari í útiveru að minnsta kosti einu sinni á dag. Útiveru er ekki sleppt nema í undantekningartilvikum. Hafa ber í huga að ekki er hægt að fyrirbyggja veikindi með inniveru, það stangast á við stefnu leikskólans um útiveru barna.



**Viðmið við veikindi:** Við hringjum í foreldra ef barn er óeðlilega slappt og tekur ekki þátt í starfinu og metum stöðuna með foreldri. Þegar hiti er kominn í 38°C þarf foreldri að sækja barnið sem og ef barnið er með niðurgang eða ælu.

### Óhöpp – slys

Leikskólinn er ábyrgur fyrir barninu þann tíma sem það dvelur í leikskólanum. Verði barn fyrir óhappi eða slysi er hringt í foreldra til að láta þá vita og gefa þeim kost á að fara með barn sitt á slystofu ef með þarf. Öll slík óhöpp eða slys eru tilkynnt foreldrum og skráð á sérstök eyðublöð í leikskólanum.

### Máltíðir

Í leikskólanum fá börnin morgunmat, hádegismat og nónhressingu. Leitast er við að hafa hollan og næringarríkan mat á borðum. Grænmeti og/eða ávextir eru alltaf í boði. Vinsamlegast látið deildarstjóra/leikskólastjóra vita strax ef barn hefur ofnæmi eða óþol fyrir einhverjum fæðutegundum og nauðsynlegt er að læknisvottorð þess efnis fylgi frá lækni. Takið umræðuna við deildarstjóra eða leikskólastjóra ef barn borðar ekki ákveðinn fæðuflokk og finnum leiðir saman.

### Lyf

Kennarar leikskólans mega ekki gefa börnunum lyf. Haga skal lyfjagjöf þannig að lyfin séu gefin heima en ekki í leikskólanum. Undantekning er þegar þarf að taka lyf að staðaldri eða astmalyf.

### Útbúnaður

Við leggjum áherslu á að börnin séu í þægilegum fötum sem börnin eiga auðvelt með að hreyfa sig og klæða sig í og úr þegar sjálfshjálp þeirra eykst. Einnig er töluvert um sull með vatni og málningu sem gæti smitast í fötin.

Klæðnaður barnanna þarf að vera í samræmi við veðurfar og hafa ber í huga að veður getur breyst snögglega. Nauðsynlegt er að hafa aukafatnað meðferðis í leikskólanum. Aukafötin eru geymd í glærum plastkössum fyrir ofan hólfið barnanna. Foreldrar eru vinsamlega beðnir að



fylgjast vel með og fylla á kassann eftir þörfum. Í aukafatakassanum þarf að vera: 2 sett af nærfötum, 2 sokkapör, 2 buxur og 2 peysur. Þegar börn eru að hætta með bleyju þarf oft að auka aðeins í kassanum meðan á því stendur.

Í hólf barnsins þarf að vera: húfa, þunn húfa/buff, regnbuxur, regnjakki, úlpa, stígvél, skór, hlý innanundirföt (flís- eða ullarföt), tvö vettlingapör og pollavettlingar. Yfir vetrartímam þarf einnig: kuldagalla, kuldaskó, ullarsokka, lambhúshettu, mögulega fleiri vettlingapör. Gott er að geyma þunna fingravettlinga heima yfir köldustu mánuðina.

Mælt er með að börnin komi með vatnsbrúsa til að auðvelda aðgengi barna að vatni í leikskólanum. Brúsarnir eru þrífir í leikskólanum eða sendir heim á föstudögum. Mikilvægt er að koma með einfalda brúsa, ekki með röri, svo auðvelt sé að þrífa og það minnkar líkur á myglumyndun. Yngstu börnin mega vera með einfalt stútglass.

Foreldrar eru beðnir að aðstoða starfsfólk deilda með því að:

- Merkja allan fatnað eins og kostur er, þá eru minni líkur á að fötin glatist.
- Ganga frá fatahólfi barns og setja skófatnað sem skilja á eftir í skóhillu. Óhrein föt þarf að taka heim og þvo.
- Tæma fatahólf barnsins í vikulok til að auðvelda þríf (fatnaður og skór).

### Fyrir svefninn

Börnin sofa öll inni, við bjóðum ekki upp á hvíld í vagni. Lök, dýnur, teppi og koddar eru til staðar í leikskólanum. Hvíldartími barna er eftir hádegismatinn og er lengd eftir þörfum hvers barns.

### Foreldrafélag / foreldraráð

Það er starfandi eitt foreldrafélag við Leik- og grunnskóla Hvalfjarðarsveitar og heitir það Foreldrafélag Leik- og grunnskóla Hvalfjarðarsveitar. Í aðalstjórn félagsins eru fimm fulltrúar, tveir-þrír fyrir hönd leikskólans og tveir-þrír fyrir hönd grunnskólans. Foreldrafélagið kemur að skipulagi ýmissa viðburða í leikskólalastarfinu, s.s. jólaföndurs, vorhátíðar og leiksýningar.



Samkvæmt lögum um leikskóla 2008 skal kosið í foreldraráð í september á hverju ári, til eins árs í senn. Foreldraráð í Skýjaborg og skólaráð í Heiðarskóla eru sameinuð í Skólaráð Leik- og grunnskóla Hvalfjarðarsveitar.

Hlutverk skólaráðs er að gefa umsagnir til leikskóla og nefndar, sbr. 2. mgr. 4. gr., um skólanámskrá og aðrar áætlanir er varða starfsemi skólans. Þá skal ráðið fylgjast með framkvæmd skólanámskrár og annarra áætlana innan skólans og kynningu þeirra fyrir foreldrum. Skólaráð hefur umsagnarrétt um allar meiriháttar breytingar á skólastarfi.

### Fréttir og upplýsingar til foreldra

Í fataherbergjum eru upplýsingatöflur þar sem ýmsar upplýsingar eru hengdar upp. Fréttir og myndir koma inn á heimasíðu leikskólans: <http://skoli.hvalfjardarsveit.is>. Skólastjóri og deildarstjórar senda út fréttir og tilkynningar í tölvupósti. Til gamans má einnig geta þess að leikskólinn heldur úti like-síðu á Facebook, <https://www.facebook.com/leikskolinnSkyjaborg>, en hún er eingöngu notuð til fréttatilkynninga og fróðleiks. Ekkert persónulegt fer þar inn.

Leikskólinn notar umsjónar- og leikskólakerfið Vala. Þar geta forráðamenn séð viðveruskráningu, máltíðarskráningu, svefnskráningu, tilkynningar og fréttir frá leikskólanum, sent og tekið á móti skilaboðum, séð myndir af barninu, matseðla og atburðardagatal leikskólans.

Með Völu-appinu er á einfaldan og þægilegan máta hægt að eiga samskipti við leikskólann um ýmislegt sem varðar vistun barna. Einfalt er að tilkynna forföll og senda leikskólanum skilaboð.

Við hvetjum forráðamenn til að nota Völu-appið en til þess þarf að sækja appið og innskrá með rafrænum skilríkjum. Völu-appið er án endurgjalds. Appið fyrir foreldra heitir *Vala leikskóli* og er hægt að nálgast það í App Store / Play Store.

### Foreldraviðtöl

Foreldraviðtöl eru tvisvar sinnum á ári, eitt að hausti og eitt að vori. Sjá má á skóladagatali vikurnar sem viðtölin eru í. Foreldrar geta ávallt óskað eftir viðtali við deildarstjóra og/eða leikskólastjóra og er þá fundinn tími.



## Leikföng að heiman

Leikföng eru leyfð á sérstökum dótadögum sem haldnir eru öðru hvoru. Á öðrum dögum viljum við að leikföngin séu geymd heima. Undantekning getur verið í aðlögun (fyrstu vikur barnsins), því það getur vakið öryggiskennd hjá yngstu börnunum að hafa með sér leikfang að heiman. Bangsar í hvíld eru í lagi. Bækur að heiman eru velkomnar alla daga ársins og viljum við minna á að merkja þær. Leikskólinn bætir ekki tjón sem getur orðið á þessum munum sem koma í leikskólann.

## Afmæli

Afmælisdagur er stór dagur í lífi barns. Á afmælisdaginn fær barnið að gera kórónu, vera þjónninn, það er sungið fyrir það og það fær sérstakt afmælistatarsett til að borða með. Einu sinni í mánuði er sameiginlegt afmæli þar sem allir í leikskólanum koma saman, syngja fyrir afmælisbörnin og fá eitthvað góðgæti frá leikskólanum eins og ber, heimagerðan ísklaka eða saltstangir.

Leyfilegt er að bjóða í afmæli í leikskólanum ef öllum á deildinni er boðið eða öllum í hóp/árgangi barnsins. Annars skal afmælisboð fara fram fyrir utan leikskólann.

## Starfsáætlun og skóladagatal

Leikskólinn gerir starfsáætlun þar sem fjallað er um árlega starfsemi, skóladagatal og ýmsar aðrar hagnýtar upplýsingar um skólaárið. Áætlunin gildir frá 1. september til 31. ágúst ár hvert. Á skóladagatalinu má sjá dagsetningar á föstum viðburðum leikskólans. Hægt er að nálgast þessar upplýsingar á heimasíðu leikskólans.

## Hátíðir, hefðir og siðir

Í leikskólanum er haldið upp á hefðbundna hátíðisdaga skv. dagatali auk sérstakra daga sem leikskólinn nýtir til að vinna að ákveðnum náms- eða þroskamarkmiðum. Þessir dagar eru: dagur leikskólans, dagur íslenskrar tungu, jól, þorri, páskar, útileikfangadagur, íþróttadagur, dagur umhverfisins, öskudagur, hjóladagur, dagur læsis, alþjóðlegi bangsadagurinn og dagur stærðfræðinnar.



Skipulag þessara hátíðisdaga er kynnt fyrir foreldrum í skóladagatali, mánaðardagatali, á heimasíðu og/eða skilaboðatöflum í leikskólanum.

## Stoðþjónusta

Við Leik- og grunnskóla Hvalfjarðarsveitar starfa sérkennari, talmeinafræðingur, sálfræðingur og hjúkrunarfræðingur. Þjónusta þeirra miðar að því að stuðla að eðlilegum framförum í leik, þroska og námi. Leitast er við að hafa sveigjanleika í öllu skipulagi til að mæta þörfum allra sem við skólann starfa. Þannig er stefnt að því að allir geti fundið verkefni sem hæfa aldri og þroska innan sinnar deildar en að þeir sem þurfa aðstoð við að auka færni sína sérstaklega geti fengið tækifæri til þess á einstaklingsforsendum sé þess þörf.

Ólöf Guðmundsdóttir, sérkennari/þroskaþjálfari, er einn dag í viku í leikskólanum. Ragnheiður Dagný Bjarnadóttir, talmeinafræðingur, kemur 6 skipti á hvorri önn í leikskólann. Aðrir í stoðþjónustu koma ef óskað er eftir því. Skólasálfræðingur er Elín Anna Baldursdóttir.

## Samþætt þjónusta í þágu farsældar barna

Á Íslandi hafa ný lög um samþætta þjónustu í þágu farsældar barna (nr. 86/2021) tekið gildi. Þessi lög varða öll börn og ungmenni á Íslandi frá 0 - 18 ára aldurs. Öll börn eiga að njóta sömu réttinda án tillits til aldurs, kynþáttar, kynferðis, trúar, ætternis, fötlunar, félagslegrar stöðu eða annarra aðstæðna.

Meginmarkmið laganna er að búa til umgjörð sem stuðlar að því að börn og foreldrar sem á þurfa að halda hafi aðgang að samþættri þjónustu við hæfi án hindrana.

Þjónusta í þágu farsældar barna er veitt á þremur þjónustustigum:

1. Stig – er grunnþjónusta fyrir alla – snemmtækur stuðningur
2. Stig – er markviss stuðningsþjónusta byggð á faglegu mati eða frumgreiningu
3. Stig – er sérhæfðari stuðningsþjónusta í samræmi við ítarlega greiningu á þörfum.

**Helstu breytingar sem ný lög boða:**



1. Tengiliður í nærumhverfi barns.
2. Málstjóri í Velferðarþjónustu.
3. Stuðningsteymi og stuðningsáætlun.

Hlutverk **tengiliðar** er fyrst og fremst að veita upplýsingar, aðstoða foreldra og barn og styðja við samþættingu þjónustu á **fyrsta stigi** í samræmi við óskir foreldra og/eða barns. Í Skýjaborg skipta **Bára Tómasdóttir** og **Sigurbjörg Friðriksdóttir** starfi tengiliðar á milli sín.

## Lokaorð

Það er von okkar að þessi handbók hafi orðið til þess að auka innsýn ykkar foreldra í starfið í Skýjaborg. Ef einhverjar spurningar vakna eru foreldrar hvattir til að leita sér frekari upplýsinga í leikskólanum.

Foreldrar/forráðamenn eru ávallt velkomnir í leikskólann!

Eyrún Jóna Reynisdóttir, leikskólastjóri



Viðauki Aðlögunaráætlun



Aðlögun Skýjaborg

Velkomin í leikskólann

**Fyrsti dagur: kl. 09:15-10:00**

.....

Foreldrar mæta með barnið í stutta heimsókn. Hitta deildarstjórann og skoða leikskólann.

**Annar dagur: 09:15-11:00**

.....

Foreldrar eru með barninu í leik og starfi inni og úti.

**Þriðji dagur: 08:30-11:30**

.....

Foreldrar eru með barninu í morgunmat, í leik og starfi inni og úti, og hádegismat. Foreldrar bregða sér frá stutta stund í samráði við deildarstjóra.

**Fjórdi dagur: 08:00-14:00**

.....

Foreldrar eru með barninu í leik og starfi. Barnið prufar að fara í hvíld / leggja sig í leikskólanum ef það hefur þörf á því. Foreldrar bregða sér frá í samráði við deildarstjóra. Foreldrar hitta leikskólastjóra þegar þeir hafa kvatt barnið sitt.

**Fimmti dagur: 08.00-16.00 (eða dvalartími barns)**

.....

Foreldrar koma með barnið inn á deildina, kveðja það og yfirgefa svæðið. Ef vel gengur getur barnið klárað sinn dvalartíma. Telji starfsmenn þörf á að stytta þann tíma verður haft samband við foreldra.

Starfsfólk Skýjaborgar